



Comunu de Lunamatrona

Sa Stòria

In su logu innoi s' agatat Lunamatrona nci biviati s' òmini giai de a innantis de is tempus de is nuragesus, ca ddoi funt unus cantu de àreas innoi si traballàt s' ossidiana (*pedra corbina, pedra pistonì*). In prus nci funt cincu nuraxis mannus, ùndixi nuraxis a una turri, una tumba/losa de is gigantis e unu putzu sagradu. Podint essi abisitaus su Nuraxi "Pitzu Cummu", a is lacanas de sa bidida, sa Tumba de is Gigantis chi ddi nant "Su cuaddu de nixias", a unus trexentus metrus de su Museu de su Logu, e su Nuraxi "Trobas".

Me in is tempus de is pùnicus e de is romanus in sa bidida si traballàt meda in sa massaria, ca si funt agataus arrogus de dentis de ossidiana chi serbiant po is farcis. Intamis, testus e candilius funt is arrastus chi ant lassau is romanus de su tempus de s'imperu.

In su Mesuevu sa bidida faiat parti de su Giuigau de Arborea, de su 1426 intrat a fai parti de su Marchesau de Aristanis, asuta de su poderi de s' Urrei de Spànnia. In su 1478, apustis de sa furriada de Leonardo de Alagon contras a is Aragonesus, imbucatu in sa giurisditzioni de sa Contea de Cuirra comenti feudu de is Carroz.

De su 1798 finsas a su 1839, ca est s'annu chi su feudalèsimu est acabau, su logu est de sa famìllia de is Osòrio de sa Cueva.

Parit chi su nòmini Lunamatrona ndi benit de su latinu "Juno Matrona", ca me in su sartu de sa bidida ddoi at unu logu chi ddi nant "Giniu", chi est su fueddu latinu "Junonis" furriau in sardu; in prus s'agatat unu tèmpiu mannu a sa dea.

In su tzentru de sa bidda nci funt domus cun murus artus, unu portali mannu e sa cresia de Santu Giuanni Batista, pesada in su sèculu XVI. Ainturu ddoi at su retàulu de Santa Maria, fatu de Antonio Mainas de sa Scola de Stampace de Casteddu.

Su Connotu

Su connotu de sa bidda ndi benit de s'antigòriu, po su chi spetat su papai, savoriu meda, su binu e is licoris fatus in domu e chi si bendint in sa bidda etotu. Is festas funt arrelatadas giai sèmpiri a is tempus de sa massaria, a sa religioni o a su traballu de is pastoris. In mesu de is traditzionis ddoi funt contus e ligendas comentis su de "Potenzia Cappai", chi fait parti de sa poesia sarda puru, fèmina abista e chi ddi praxiat fueddai meda, si narat chi agoa de sa morti s'ànima sua fut abarrada in sa terra finsas a candu dda iat agiudada unu preidi.

Su Logu

Sa bidda s'agatat a 180 metrus de altitudini, in su pranu ainturu de sa Marmilla chi nci passat su Frùmini Mannu. Est manna unus 21 chilòmetrus cuadraus e totu a ingèriu nci funt is giaras de Siddi e de Gèsturi e is cùcurus de sa Trexenta. Ddoi funt pagus matas ca ddoi at pagu àcua. Po cussu si pascit su bestiàmini e in s' istadi su colori de is terras est grogu e brundu ingespiau de su birdi de is bingias, de su matedu e de is froris, aicetotu de is matas de olia e de mendula. Sa sienda ambientali e archeològica de Lunamatrona fait parti de su Cunsòrtziu "Sa Corona Arrùbia", nàsciu de unu assòtziu intra de cuàturu comunus: Collinas, Lunamatrona, Siddi, Biddanobaeforru e agoa amanniau cun àterus comunus. Su Cunsòrtziu ddi nant Sa Corona Arrùbia poita in sa giara de Siddi s'agatant matas de colori arrùbiu.

S' Economia

Is traballus de sa bidda funt acapiaus a sa laurera e a sa pastoritzia. Si fait meli bonu puru, farra de grandu calidadi, olia e ollu, malvasia e meloni, mancai ddoi at pagu àcua.